

Tollwei un Krutzekriech

De Vetter Ludwich hat in jingre Johre recht geere oft un tief ins Glas gschaut. Nit dass er e ausgsprochener Trinker gewenn wär. Awer die Kumrade, die Arweitskullegre han noh Schichtwechsl geere noch verzählt mitnaner. Un wu verzählt mer am beschte? Im Wertshaus bei eem Glas Raki oder Wein natierlich!

For die Bäsl Lentschi war der Moment, wu ihre Mann mit eem Dusel hemkumm is, abscheulich. Sie hat nie ihre Maulwerk im Zahm halle kenne.

Wann der Mann die Haustier ufsperre hat wille, hat sie schun vun drin anfang zu schenne un zu towe. Sovill hat der Vetter Ludwich, der wu mied, hungrich un schlofrich war, gebraucht. Natierlich hat aach er anfang Tollwei zu schlaan. De Krutzekriech war do!

Die zwaa Eheleit, die wu sich ansunschte ganz gut verstan han, sie han sich naner die wischeschte Sache an de Kopp geworf. Kenner hat nohgin wille. Un sowas geht nie gut aus. Vill Porzellan hat im Laufe der Johre dran glaawe misse un is in Franse gang, Finschterscheiwe sin ingschlaa gin, hie un do is sogar e Stuhl ohne Stempl geblieb.

Gar zu oft hat die Bäsl Lentschi sich vorghol, um Gottswille ruhich zu sin, wann se gsieht, dass ihre Mann eene anhänge hat. Oft hat se gedenkt, for was der nit wie anri Männer, wann se bsoff sin, sich ufs Ohr leet un sei Rausch ohne Schkandal ausschloft. Doch erscht noh gudi Johre is des Weib drufkumm, dass es aach drum sin kennt, weil se de Ludwich direkt zum Tollweischlaan rausfordert.

Un so hat se sich felsefescht vorghol, mol zu versuche im Gude zu verhandle.

Un es hat funktioniert. Wie de Ludwich mol nochmol mit eener kräftich Fahn hemkumm is, hat se kummod im Ohresessl ghuckt, is ufgsprung, hat dem Mann gholf die Schuh ausziehe. Ke Muckser hat se gsaat. Sie hat es Esse uf de Tisch gstellt un sogar e Glas Wein newer de Teller.

De Vetter Ludwich war in seim Dusel so perplex, dass er aach stumm wie e Fisch geblieb is. Er hat sei Supp geleffelt, hat sei Weib schief nuf anschaut. Wie er noh em gfillte Kraut aa noch e Glas Wein kriet hat, war er zufriede, hat sich sogar ausziehe gelosst un is standeppe in e tiefe Schlof gfall.

Am anre Tach hat er zwar gfroot, ob er geträämt hätt, dass des Lentschi ne so zuvorkommen behandelt hat. Des hat nor mitm Kopp gebeidelt. Un die Gäng ins Wertshaus sin beim Ludwich immer seltener gin. Wanns doch mol vorkumm is, hat sei Weib ne mit Häntsche behandelt - un die Welt war heel un rund – alles war in beschter Ordnung. Hie un do sin die zwaa sich schun noch in die Quer kumm, manchmol war a Tollwei an der Tagesordnung. Doch e aldes Sprichwort profezeit: Wer sich liebt, der neckt sich! Un Tollwei kann sicher aa Neckerei sin! Oder?